



Inatsisartunut Ilaasortaq Anthon Frederiksen, Partii Naleraq

Erniat appartinneqarnissaat pillugu § 37 malillugu apeqqutinut 12. februar 2015-imeersunut akissut

24-02-2015
Suliap normua 2015-111660
All. nr. 1868928

P. O. Box 1037
3900 Nuuk
Oqarasuaat +299 34 50 00
Nassitsigasuaat (+299) 34 63
50
E-mail: oed@nanoq.gl
www.naalakkersuisut.gl

1. Danmarkimi aningaaseriviit erniarititaasa appariarujussuarnerat nunatsinni aningaasaqarnikkut qanoq sunniuteqarsinnaava?

Akissut:

Danmarkimi ataatsimut isigalugu erniat annertussusiisa annikillisinneqarnerat ingerlatseqatigiiffinnut aamma/imaluunniit inunnut Danmarkimi aningaaserivinni allanngorartunik ernialinnik akiitsulinnut ingerlaannartumik sunniuteqassaaq.

Tamanna isumaqarportaaq inuit suliffeqarfiillu aningaasaliiniarlutik taarsigassarserusuttut akikinnerusumik aningaasaliivigineqarsinnaanerannik. Tamanna taamatutaaq namminersortut ingerlatsiviini aningaasaliissutit qaffasissusiannut pitsaasumik sunniuteqassaaq.

Taamaattoq naatsorsuutigineqanngilaq sunniutaasussat aningaasaqarnermut tamarmiusumut imaaliinnarlugu annertunerusunik sunniutissasut, ernianimmi appartitsinerit eqqartorneqartut ingerlagallaannartussatut naatsorsuutigineqarmata, siullermillu ernianut sivikitsumi akilersugassanut sunniuteqarnerpaassallutik.

2. Apeqqummi 1-imi erniat appariarujussuarnerat Namminersorlutik Oqartussat ingerlatseqatigiiffiini ilaatigut nunatta avataaniit aningaasarpassuarnik attartorsimasunut qanoq sunniuteqarsinnaava?

Akissut:

Namminersorlutik Oqartussat aktiaateqarlutik ingerlatseqatigiiffiutaanni akiitsut tamarmiusut ilaminiinnanngui allanngorartunik ernialersugaapput, Danmarkimilu aningaaserivinni/aningaasaliisarfinni taarsigassarsiaallutik. Taamaammatt ernianik appartitsinerit toqqaannartumik sunniutissaat killeqarallassaaq. Taamaattoq erniat

annertussusiat appasittuaannalerpat - aammattaaq nunarsuaq tamakkerlugu - ingerlatseqatigiiffinnut ataatsimut isigalugu annikinnerusumik ernianut nammagassaqalersitsissaaq pitsaanerusumillu angusaqarnissamut iluaqutaassalluni.

Qularnarporli erniat annertussusiat siunissami appasittuaannartinneqarsinnaassanersoq.

3. Apeqqummi 1-imi erniat appariarujussuarnerat Nunatsinni aningaaseriviit ernialiuttagaannut qanoq sunniuteqarsinnaappat?

Akissut:

Aallaaviatigut Kalaallit Nunaanni aningaaseriveqarnek Danmarkimi aningaaseriveqarnermut danskillu koruuniannut atavoq, taamaammat danskit aningaasanik niuerfiini sunniutaasut aammattaaq Kalaallit Nunaanni sunniuteqassapput. Taamaattoq aningaaseriviit ataasiakkaat namminnek nalilissavaat maannakkut pissutsit erniat appartinneqarnerannik kinguneqassanersut taamaassappallu qanoq annertutigisumik.

Aammaarlugu erseqqissassallugu pissutissaqarpoq qanittuklut ernianik appartitsinerit ataavartuunaviarunangimmata.

4. Pissutsit qulaani eqqartorneqartut nunatta avammut niuerneranut qanoq sunniuteqarsinnaappat?

Akissut:

Ilimanangilaq Danmarkip aningaasanik aalaakkaasumik naleqartitsinera aalajangiusimaneqarallartillugu nunanut allanut niuerneranut malugineqarsinnaasumik sunniuteqassanersut. Kisiannili danskit koruuniat Euromut naleqqiullugu ilimagineqanngitsutut naleqarnerulissappat taava tamatuma kingunerissagunarpaa danskit kalaallillu unammillersinnaassuseqarnerisa suli ajorseriaqqinnerat. Tamannalu nunanut allanut tunisatigut isertitanut danskit koruuninut uuttorneqartartunut pitsaanngitsumik sunniuteqassaaq. Tamannattaaq suleqatigiinnissamik isumaqatigiissutinut atatillugu EU-mit akiliutaasartunut euronngorlugit uuttortarneqartartunut pitsaanngitsumik sunniuteqassaaq.

5. Nunarsuarmi olie-p akiata appariarujussuarnera Danmark-imi niuerneranut akinut pisisartut tungaanniit ilorraap tungaanut sunniuteqalereersoq nunatsinni pisisartunut qanoq sunniuteqarsinnaava?

Akissut:

Kalaallit Nunaanni atuisunut akigitat allanngoriartornerat nioqqutissat Danmarkimiit eqqussorneqartut amerlaqimmata taakku Danmarkimi allanngoriartornerannik sunnersimaneqarpoq. Taamaammat naatsorsuutigisariaqarpoq Danmarkimi aningaasat annikitsuinnarmik nalikilliartrornerat Kalaallit Nunaanni aningaasat nalikilliartrornerata annikitsuinnaanissaanut pissutaaqataajumaartoq.

KNI A/S Polaroil, Kalaallit Nunaanni uuliap tuniniaasarfinni akiinik aalajangersaasartoq paasissutissiivoq taamaaliortoqartoq, ingerlatseqatigiiffiup pisinermini akiliutigisartagai agguaassisarnermut uninngasuuteqarnermullu aningaasartuutitut matusissutissanut iluanaarutissat ilanngullugit aallaavigalugit.

KNI A/S Polaroil ukiorpassuarni tunngaviusumik isumaqatigiissutit sivisuumik atuuttut aqutigalugit pisiortornerminik iluarsaassisarpoq. Taamaammat qaqugu qanorlu annertutigisumik KNI A/S Polaroilip pisinermini akiliutigisartagai tuniniaavinni akit appartinneqarnerinut periarfissiuumaarnersut maannakkuugallartoq ilisimaneqanngilaq.

Inussiarnersumik inuulluaqqusillunga



Anda Uldum